

ZAKON O UNIVERZITETU

I. OSNOVNE ODREDBE

Član 1.

Univerzitet je zajednica u kojoj se obavezno udružuju više škola, fakulteti i umjetničke akademije (u daljem tekstu: visokoškolske ustanove) radi ostvarivanja i unapređivanja djelatnosti visokog obrazovanja.

Univerzitet ima svojstvo društvenog pravnog lica.

Član 2.

Djelatnost visokog obrazovanja, u smislu ovog zakona, obuhvata nastavni i naučno istraživački, odnosno umjetnički rad.

Nastavni i naučno istraživački, odnosno umjetnički rad oraganizuje se kao dodiplomski i postdiplomski studij.

Dodiplomski studij organizuje se za sticanje više i visoke stručne spreme , a postdiplomski studij za sticanje stručnog stepena specijaliste, naučnog, odnosno umjetničkog stepena magistra i naučnog stepena doktora nauka.

Član 3.

Djelatnost visokog obrazovanja je od posebnog društvenog interesa.

Član 4.

Razvoj djelatnosti visokog obrazovanja utvrđuje se dugoročnim programom, koji donosi Skupština Republike Bosne i Hercegovine (u daljem tekstu: Skupština RBiH).

Programom iz prethodnog stava naručito se utvrđuje obim potreba za obrazovanjem određenog profila kadrova, kao i vrsta i broj visokoškolskih ustanova.

Član 5.

U visokoškolskoj ustanovi i na univerzitetu zabranjeno je političko i religijsko organizovanje i djelovanje.

II. UNIVERZITET

Član 6.

Visokoškolske ustanove udružuju se u jedan od univerziteta u Republici Bosni i Hercegovini.

U univerzitet se mogu udružiti i naučne ustanove kada je to utvrđeno pravilima univerziteta.

Visokoškolske ustanove i naučne ustanove iz prethodnih stavova, zadržavaju svojstvo pravnog lica.

Član 7.

Udruživanja u univerzitet vrši se na osnovu ugovora.

Na zaključivanje ugovora, njegove izmjene i dopunre i raskid ugovora saglasnost daje Skupština R BiH.

Član 8.

Univerzitet organizuje dodiplomski studij za sticanje visoke stručne spreme i postdiplomski studij za sticanje naučnog, odnosno umjetničkog stepena magistra iz interdiscipliniranih i multidiscipliniranih naučnih, odnosno umjetničkih oblasti i obavlja druge poslove utvrđene ovim zakonima.

Univerzitet može obavljati i druge poslove u skladu s ugovorom iz stava 1. prethodnog člana.

Član 9.

Univerziteti se mogu udruživati u zajednicu univerziteta Bosne i Hercegovine radi ostvarivanja zajedničkih interesa.

III. VISOKOŠKOLSKE USTANOVE

Član 10.

Viša škola organizuje dodiplomski studij za sticanje više stručne spreme.

Fakultet, odnosno umjetnička akademija organizuje dodiplomski studij za sticanje visoke stručne spreme i postdiplomski studij za sticanje stručnog stepena specijaliste, naučnog odnosno umjetničkog stepena magistra i naučnog stepena doktora nauka.

Fakultet odnosno umjetnička akademija, može organizovati i dodiplomski studij za sticanje više stručne spreme.

Visokoškolska ustanova ima svojstvo pravnog lica.

Visokoškolska ustanova ima pečat sa grbom Republika Bosne i Hercegovine.

Član 11.

Visokoškolsku ustanovu može osnovati domaće društveno pravo, građansko pravno i fizičko lice i strano pravno i fizičko lice u svim oblicima svojine.

Javnu visokoškolsku ustanovu u državnoj svojini može osnovati samo Skupština R BiH.

Član 12.

Visokoškolske ustanove osnivaju se i rade u skladu sa Standardima visokog obrazovanja i Normativima, koji se donose zavisno od vrste studija u visokoškolskim ustanovama.

Standardima visokog obrazovanja utvrđuju se opći, a Normativima posebni uslovi za kvalitetno obavljanje nastavnog i naučnoistraživačkog, odnosno umjetničkog rada.

Osnivač visokoškolske ustanove obezbjeđuje sredstva potrebna za osnivanje i rad visokoškolske ustanove u skladu sa Standardima visokog obrazovanja i Normativima.

Član 13.

Prije donošenja akta o osnivanju javne visokoškolske ustanove, Skupština R BiH usvaja elaborat o društveno-ekonomskoj opravdanosti osnivanja visokoškolske ustanove (u daljem tekstu: elaborat).

Elaborat podnosi odgovarajući univerzitet.

Elaborat obavezno sadrži: dokaz o postojanju društvene potrebe za obrazovanjem određenog profila kadra u Republici Bosni i Hercegovini koji se ne može obrazovati u postojećim visokoškolskim ustanovama i univerzitetima; dužinu trajanja studija; okvirni nastavni plan i nastavne programe; stručni naziv koji se steče po završetku studija; opšte i posebne uslove po Standardima visokog obrazovanja i Normativima i sredstva za ispunjenje tih uslova.

Član 14.

Ako Skupština R BiH usvoji elaborat, imenuje komisiju matičara i utvrđuje rok za podnošenje izvještaja.

Komisija matičara:

- Donosi nastavni plan i nastavne programe;
- Donosi opći akt o pravilima studija;
- Objavljuje konkurs i vrši izbor nastavnika i viših asistenata za sve nastavne predmete prve i druge godine studija, od kojih za dvije trećine obaveznih predmeta – nastavnike u radnom odnosu sa najmanje polovinom od punog radnog vremena;
- Predlaže broj studenata za upis na prvu godinu studija.

Bliži propis o radu komisije matičara donosi funkcioner koji rukovodi republičkim organom uprave nadležnim za poslove obrazovanja.

Član 15.

Skupština R BiH donosi akt o osnivanju javne visokoškolske ustanove na osnovu izvještaja komisije matičara.

Član 16.

Javna visokoškolska ustanova može osnovati odsjek radi uvođenja nove vrste studija, uz prethodnu saglasnost Skupštine RBiH.

Zahtjev za davanje saglasnosti podnosi visokoškolska ustanova. Zahtjev sadrži iste podatke kao i elaborat iz člana 13. stav 3. ovog zakona.

Uz zahtjev, visokoškolska ustanova dostavlja mišljenje odgovarajućeg univerziteta i republičkog organa uprave nadležnog za poslove obrazovanja.

Član 17.

Novoosnovana visokoškolska ustanova, odnosno odsjek, može početi sa radom na osnovu rješenja republičkog organa uprave nadležnog za poslove obrazovanja.

Zahtjev za donošenje rješenja iz prethodnog stava podnosi se najkasnije tri mjeseca prije početka školske godine.

Član 18.

Visokoškolska ustanova, odnosno odsjek može da obavlja djelatnost visokog obrazovanja, ako trajno:

1. Ispunjava opće i posebne uslove po Standardima visokog obrazovanja i Normativima;
2. Ima nastavnike za sve nastavne predmete, od kojih za dvije trećine obaveznih nastavnih predmeta u radnom odnosu sa najmanje polovinom od punog radnog vremena;
3. Ima nastavni plan i nastavne programe donesene u skladu sa ovim zakonom.

Član 19.

Republički organ uprave nadležan za poslove obrazovanja dužan je da najmanje dvaput u četiri godine utvrdi da li visokoškolska ustanova odnosno odsjek ispunjava uslove iz prethodnog člana.

Ako organ iz prethodnog stava utvrdi da visokoškolska ustanova odnosno odsjek ne ispunjava uslove iz prethodnog člana, određiće rok za otklanjanje utvrđenih nedostataka.

U roku iz prethodnog stava visokoškolska ustanova ne može vršiti upis studenata u prvu godinu studija.

Ukoliko se u određenom roku nedostaci ne otklone, organ iz stava 1. ovog člana rješenjem će zabraniti obavljanje djelatnosti visokoškolskoj ustanovi, odnosno odsjeku, i o tome obavjestiti osnivače i nadležni sud koji vodi sudski registar ustanova.

Član 20.

U slučaju prestanka visokoškolske ustanove, osnivač je dužan da zatečenim studentima omogućiti završavanje studija.

IV. NASTAVNI I NAUČNOISTRAŽIVAČKI ODNOSNO UMJETNIČKI RAD

1. Dodiplomski studij

Član 21.

Dodiplomski studij za sticanje više stručne spreme traje od dvije do tri godine, a za sticanje visoke stručne spreme od četiri do šest godina.

Član 22.

Dodiplomski studij organizuje se obavezno za redovne studente.

Dodiplomski studij organizuje se i za vanredne studente, kada je to spojivo sa prirodom studija, uz saglasnost univerziteta.

Član 23.

Dodiplomski studij izvodi se po nastavnom planu i nastavnim programima.

Nastavnim planom utvrđuje se nastavni predmeti i ukupan broj časova predavanja, vježbi i drugih obaveznih oblika nastavnog rada (u daljnjem tekstu: nastava)

Nastavnim programom utvrđuje se sadržaj nastavnog predmeta, način izvođenja nastave i polaganje ispita i obavezni udžbenici i priručnici na osnovu kojih se polaže ispit iz tog nastavnog predmeta.

Član 24.

Nastavni predmeti su opći, stručni i fakultativni.

Opći i stručni nastavni predmeti su obavezni.

Opće nastavne predmete utvrđuje univerzitet.

Fakultativni nastavni predmeti mogu se uvoditi radi proširivanja stručnih znanja i opće kulture studenata. Fakultativni nastavni predmet postaje obavezan nakon što je student izvršio izbor.

Član 25.

Nastavni plan i nastavne programe općih nastavnih predmeta donosi univerzitet.

Nastavni plan i nastavne programe stručnih i fakultativnih nastavnih predmeta donosi visokoškolska ustanova, uz prethodnu saglasnost univerziteta, odnosno univerziteta koji organizuje dodiplomski studij.

Član 26.

Nastavni plan dodiplomskog studija sastavni je dio pravila visokoškolske ustanove odnosno općeg akta univerziteta koji organizuje dodiplomski studij.

Nastavni plan visokoškolskih ustanova, odnosno univerziteta objavljuje se u biltenu univerziteta.

Visokoškolska ustanova odnosno univerzitet koji organizuje dodiplomski studij, dužni su da objave nastavne programe na način utvrđen pravilima visokoškolske ustanove, odnosno općim aktom univerziteta.

Član 27.

Promjenu nastavnog plana i nastavnih programa prati nastavno-naučno odnosno nastavno – umjetničko vijeće visokoškolske ustanove, odnosno univerziteta koji organizuje dodiplomski studij i daje prijedlog za njihovu izmjenu.

Nastavno naučno, odnosno nastavno-umjetničko vijeće visokoškolske ustanove odnosno univerzitet, dužno je da najkasnije u roku od četiri godine od početka primjene nastavnog plana i nastavnih programa pokrene postupak za njihovo cjelovito preispitivanje.

Izmjena nastavnog plana i nastavnih programa vrši se po istom postupku utvrđene ovim zakonom za njihovo donošenje.

Studenti imaju pravo da završe započeti studij po nastavnom planu koji je važio prije izvršene izmjene, u roku utvrđenom pravilima visokoškolske ustanove odnosno općim aktom univerziteta koji organizuje dodiplomski studij.

Član 28.

Nastava i ispiti iz određenih nastavnih predmeta mogu se obavljati za sve studente istog univerziteta u visokoškolskoj ustanovi koja je matična za taj predmet.

Nastavne predmete i matičnu visokoškolsku ustanovu utvrđuje univerzitet.

Međusobna prava i obaveze između matične visokoškolske ustanove i visokoškolskih ustanova za koje se obavlja nastava i ispiti uređuje se ugovorom.

Član 29.

Nastava i ispiti obavljaju se u toku školske godine.

Školska godina počinje 1.oktobra tekuće i završava 30.septembra naredne kalendarske godine.

Školska godina dijeli se na zimski i ljetni semestar.

Nastava u jednom semestru traje najmanje 15 sedmica.

Sedmični broj časova nastave za studente ne može biti manji od 25, ni veći od 30 časova.

U sedmični broj časova iz prethodnog stava ne ulaze opći i fakultativni nastavni predmeti.

Ispiti se obavljaju u januarsko-februarskom, junsko-julskom i septembarskom ispitnom roku. Svaki ispitni rok ima po dva ispitna termina.

Studenti imaju pravo da polažu ispite u svakom ispitnom terminu.

Član 30. brisan

2. Postdiplomski studij

Član 31.

Postdiplomski studij za sticanje stručnog stepena specijaliste i naučnog odnosno umjetničkog stepena magistra organizuje fakultet i umjetnička akademija iz stručnih, umjetničkih i naučnih oblasti za koje je matičan.

Matični fakultet i umjetničku akademiju utvrđuje univerzitet.

Postdiplomski studij za sticanje naučnog odnosno umjetničkog stepena magistra iz interdisciplinarnih i multidiscipliniranih naučnih, odnosno umjetničkih oblasti organizuje univerzitet.

Postdiplomski studij za sticanje stručnog stepena specijaliste traje najmanje dva semestra, a za sticanje naučnog, odnosno umjetničkog stepena magistra najmanje tri semestra.

Član 32.

Postdiplomski studij organizuje se za redovne studente, a uz saglasnost univerziteta može se organizovati i za vanredne studente.

Postdiplomski studij izvodi se po nastavnom planu i nastavnim programima.

Nastavni plan i nastavne programe postdiplomskog studija donosi fakultet i umjetnička akademija, uz prethodnu saglasnost univerziteta, odnosno univerzitet koji organizuje postdiplomski studij.

Nastavni plan postdiplomskog studija sastavni je dio općeg akta fakulteta i umjetničke akademije, odnosno univerziteta koji organizuje postdiplomski studij.

Član 33.

Na nastavni plan, nastavne programe i organizovanje postdiplomskog studija shodno se primjenjuju odredbe člana 23.st. 2 i 3, člana 26 st. 2 i 3, čl. 27 i 28, i člana 29. stav 1. ovog zakona.

Član 34.

Postdiplomski studij završava se odbranom specijalističkog, odnosno magistarskog rada.

Fakultet i umjetnička akademija dužni su da specijalistički, odnosno magistarski rad nakon odbrane dostave svim univerzitetima u Republici Bosni i Hercegovini.

Član 35.

Stručni stepen specijaliste i naučni, odnosno umjetnički stepen magistra može se oduzeti ako se utvrdi da specijalistički, odnosno magistarski rad nije samostalan rad.

Odluku o oduzimanju stručnog stepena specijaliste i naučnog, odnosno umjetničkog stepena magistra donose fakultet ili umjetnička akademija i javno je objavljuju, na način utvrđen pravilima univerziteta.

Član 36.

Bliže odredbe o uslovima i postupku za sticanje stručnog stepena specijaliste i naučnog odnosno umjetničkog stepena magistra i o uslovima i postupku za oduzimanje tih stepena sadrži statut univerziteta.

Član 37.

Sticanje stručnog stepena specijaliste iz oblasti medicinskih nauka uređuje se posebnim zakonom.

3. NAUČNI STEPEN DOKTORA NAUKA

Član 38.

Naučni stepen doktora nauka je najviši naučni stepen koji se stiče na fakultetima i umjetničkim akademijama koji su matični za odgovarajuću naučnu oblast.

Matični fakultet i umjetničku akademiju utvrđuje univerzitet.

Naučni stepen doktora nauka stiče se odbranom doktorske disertacije.

Doktorska disertacija je rezultat samostalnog naučno-istraživačkog rada kojim se daju novi naučni rezultati i doprinosi razvoju naučne misli.

Član 39.

Naučni stepen doktora nauka može steći kandidat sa odgovarajućom visokom stručnom spremom, koji ispunjava jedan od uslova:

- Da ima naučni stepen magistra i objavljene naučne radove iz odgovarajuće naučne oblasti, ako odbrani pozitivno ocjenjenu doktorsku disertaciju;
- Da ima stručni stepen specijaliste i objavljene naučne radove iz odgovarajuće naučne oblasti, ako položi usmeni doktorski ispit iz odgovarajuće naučne oblasti i odbrani pozitivno ocjenjenu doktorsku disertaciju.

Član 40.

Ocjenu uslova iz prethodnog člana i podobnost teme doktorske disertacije vrši komisija, koju na prijedlog matičnog fakulteta, odnosno umjetničke akademije obrazuje univerzitet.

Članovi komisije iz prethodnog stava su nastavnici visokoškolskih ustanova, naučni radnici i članovi akademije nauka i umjetnosti, od kojih svi imaju naučni stepen doktora nauka, a većina iz naučne oblasti iz koje se prijavljuje doktorska disertacija.

Član 41.

Fakultet odnosno umjetnička akademija dužna je da odredi mentora radi pružanja pomoći kandidatu prilikom izrade doktorske disertacije.

Mentor može biti redovni ili vanredni profesor koji ima objavljene naučne radove iz naučne oblasti iz koje se radi doktorska disertacija.

Član 42.

Doktorska disertacija javno se brani pred komisijom koja se obrazuje u sastavu i na način utvrđen članom 40. ovog zakona.

Univerzitet je dužan da doktorsku disertaciju učini dostupnom javnosti najkasnije 30 dana prije njene odbrane, na način utvrđen pravilima univerziteta.

Doktorsku disertaciju nakon odbrane univerzitet dostavlja Narodnoj i univerzitetskoj biblioteci Bosne i Hercegovine i univerzitetima u Republici Bosni Hercegovini.

Izvod iz doktorske disertacije univerzitet je dužan da objavi na način utvrđen pravilima univerziteta.

Član 43.

Istaknutim naučnim, stručnim i drugim radnicima iz inostranstva koji svojim djelima unapređuju nauku može se dodjeliti počasni doktorat nauka.

Počasni doktorat nauka dodjeljuje univerzitet na svoj prijedlog ili na prijedlog odgovarajućeg fakulteta ili umjetničke akademije.

Član 44.

Naučni stepen doktora nauka može se oduzeti ako se utvrdi da doktorska disertacija nije rezultat samostalnog naučnog–istraživačkog rada.

Odluku o oduzimanju naučnog stepena doktora nauka donosi univerzitet i javno je objavljuje, na način utvrđen pravilima univerziteta.

Član 45.

Bliže odredbe o uslovima i postupku za sticanje naučnog stepena doktora nauka i za oduzimanje tog stepena sadrže pravila univerziteta.

4. STALNO STRUČNO USAVRŠAVANJE

Član 46.

Stalne i povremene oblike stručnog usavršavanja organizuju visokoškolske ustanove i univerziteti.

Program stručnog usavršavanja donosi nastavno–naučno odnosno nastavno–umjetničko vijeće visokoškolske ustanove odnosno univerziteta.

O učešću u pojedinim oblicima stručnog usavršavanja izdaje se odgovarajuće uvjerenje.

5. NAUČNOISTRAŽIVAČKI, ODNOSNO UMJETNIČKI RAD

Član 47.

Naučnoistraživački odnosno umjetnički rad organizuje se radi unapređivanja naučnih i umjetničkih disciplina koje se izučavaju u nastavnim predmetima, utvrđenim nastavnim planovima dodiplomskog studija visokoškolskih ustanova odnosno univerziteta koji organizuju dodiplomski studij.

Naučnoistraživački odnosno umjetnički rad izvodi se prema programu tog rada, koji donosi nastavno–naučno odnosno nastavno–umjetničko vijeće visokoškolske ustanove odnosno univerziteta.

Nastavnici i viši asistenti ostvaruju program naučno-istraživačkog odnosno umjetničkog rada u okviru svojih radnih obaveza.

Član 48.

Pored naučnoistraživačkog rada, iz prethodnog člana, visokoškolska ustanova obavlja i naučnoistraživački rad, u skladu sa Zakonom.

V. STUDENTI

Član 49.

Status studenta dodiplomskog studija stiče se upisom u prvu godinu studija.

Upis se vrši na osnovu konkursa.

Pravo učešća na konkursu imaju lica sa završenim srednjim obrazovanjem u Republici Bosni i Hercegovini.

Pravo učešća na konkursu imaju državljani RBiH, strani državljani i lica bez državljanstva sa završenim srednjim obrazovanjem u inostranstvu.

Član 50.

Konkurs za upis studenata u prvu godinu dodiplomskog studija sadrži:

1. broj kandidata za upis, kao redovnih i varednih studenata, posebno za kandidate iz st. 3 i 4 prethodnog člana;
2. broj redovnih studenata državljana R BiH koji ne plaćaju troškove studija za prvu godinu studija;
3. visinu troškova studija za ostale studente;
4. osnove i mjerila za utvrđivanje redoslijeda prijema kandidata za upis;
5. način provjere znanja i sposobnosti kandidata za odgovarajući studij i prosjek ocjena u srednjoškolskom obrazovanju;
6. vrijeme provjere znanja i sposobnosti kandidata za odgovarajući studij, posebno za kandidate iz st. 3 i 4. prethodnog člana;
7. nadležne organe i postupak zaštite prava kandidata koji nisu primljeni za upis;
8. vrijeme upisa primljenih kandidata.

Elemente konkursa iz tač. 1, 2. i 3. prethodnog stava utvrđuje Republički javni fond za visoko obrazovanje (u daljem tekstu: Republički javni fond), a iz tač. 4, 5, 6, 7. i 8. visokoškolska ustanova. Elementat iz tačke 1. Republički javni fond utvrđuje na prijedlog univerziteta, u skladu sa prostornim, kadrovskim i uslovima opremljenosti visokoškolske ustanove, a elementat iz tačke 4. utvrđuje visokoškolska ustanova, u skladu sa zajedničkim osnovama i mjerilima za utvrđivanje redoslijeda prijema kandidata koje donose univerziteti zajednički.

Konkurs za upis studenata u prvu godinu dodiplomskog studija objavljuju univerziteti zajednički u javnim glasilima, uz prethodnu saglasnost republičkog organa uprave nadležnog za poslove obrazovanja, najkasnije četiri mjeseca prije početka školske godine.

Član 51.

Državljanin R BiH, strani državljanin i lica bez državljanstva imaju pravo učešća na konkursu za upis na prvu godinu dodiplomskog studija i pravo učešća na provjeri znanja i sposobnosti kandidata za odgovarajući studij i prije izvršene nostrifikacije odnosno ekvivalencije svjedodžbe o završenom srednjem obrazovanju u inostranstvu.

Primljeni kandidat iz prethodnog stava može se upisati u prvu godinu dodiplomskog studija nakon izvršene nostrifikacije odnosno ekvivalencije svjedodžbe o završenom srednjem obrazovanju u inostranstvu, a najkasnije do početka školske godine.

Član 52.

Status studenta postdiplomskog studija stiče se upisom u prvu godinu studija.

Upis se vrši na osnovu konkursa

Pravo učešća na konkursu imaju kandidati sa završenom odgovarajućom visokom stručnom spremom, zavisno od vrste postdiplomskog studija.

Sadržaj i način objavljivanja konkursa utvrđuje univerzitet.

Član 53.

Visokoškolska ustanova, odnosno univerzitet koji organizuje dodiplomski i postdiplomski studij izdaje upisanom studentu upisnicu (indeks) kojom se dokazuje status studenta.

Član 54.

Studenti dodiplomskog studija ostvaruju prava i izvršavaju obaveze u toku studija u skladu sa nastavnim programima i pravilima visokoškolske ustanove, odnosno općim aktom univerziteta koji organizuje dodiplomski studij i ovim zakonom.

Član 55.

Student može upisati narednu godinu studija ako do kraja školske godine ne položi ispite iz najviše dva nastavna predmeta tekuće godine studija, u skladu sa pravilima visokoškolske ustanove, odnosno općim aktom univerziteta koji organizuje dodiplomski studij.

Student ne može polagati ispite iz tekuće godine dok ne položi ispite iz prethodne godine studija.

Student koji ne ispuni uslove za upis u narednu godinu studija obnavlja upis u istu godinu studija.

Član 56.

Prava i obaveze studenata miruju dok je na odsluženju odnosno dosluženju vojnog roka i na porodijskom odsustvu.

Visokoškolska ustanova, odnosno univerzitet koji organizuje dodiplomski studij može studentu, na njegov zahtjev, odobriti da mu iz opravdanih razloga određeno vrijeme, a najduže godinu dana, miruju prava i obaveze.

Student kome ne miruju prava i obaveze u skladu sa prethodnim stavovima i koji ne upišu narednu godinu studija odnosno ne obnovi upis u istu godinu studija, izjednačava se sa studentom koji se ispisao sa visokoškolske ustanove.

Član 57.

Visokoškolska ustanova može obavezati redovne studente državljanke Republike Bosne i Hercegovine da plaćaju troškove studija, u skladu sa kriterijima Republičkog javnog fonda.

Član 58.

Pravila visokoškolske ustanove odnosno pravila univerziteta koji organizuje dodiplomski studij, pored pitanja uvedenih u skladu sa Zakonom o ustanovama („Službeni list RBiH“, br.6/92 i 8/93) i Zakonom o univerzitetu, obavezno uređuju i :

- vrijeme održavanja nastave za redovne i posebno za vanredne studente;
- pravo prigovora na ocjenu;
- bliže uslove za upis u narednu godinu studija;

- prava i obaveze studenata koji su obnovili upis;
- uslove i način ponovnog sticanja statusa studenta;
- način priznavanja položenih ispita u istoj ili drugoj visokoškolskoj ustanovi;
- uslove za nastavak studija prilikom prelaska iz druge visokoškolske ustanove;
- uslove pod kojima zainteresovana lica mogu pohađati nastavu i polagati ispite iz određenih nastavnih predmeta;
- uslove za prijevremeno završavanje studija;
- uslove i način uključivanja redovnih studenata u naučno-istraživački rad;
- pohvale i nagrade;
- lakše i teže povrede obaveza studenata;
- Nadležne organe i postupak odlučivanja o pravima i obavezama studenata i o zaštiti prava kandidata koji nisu primljeni po konkursu za upis u prvu godinu studija;
- uslove sticanja diplome;
- obaveze nastavnika i saradnika u izvođenju nastave.

Član 59.

Znanje i sposobnost studenata dodiplomskog studija na ispitu ocjenjuje se ocjenom od 5 (pet) do 10 (deset). Ocjena 6 (šest) je najniža prolazna ocjena.

Član 60.

Mjere za povrede obaveza studenata dodiplomskog studija su: opomena, javna opomena i isključenje iz visokoškolske ustanove.

Mjera isključenja može se izreći u trajanju od jedne do tri školske godine samo za teže povrede obaveza.

Član 61.

Status studenta dodiplomskog studija prestaje:

1. diplomiranjem;
2. ispisom, odnosno u slučaju iz člana 56. stav 3. ovog zakona;
3. danom izrečene mjere isključenja;
4. danom stupanja na izdržavanje kazne zatvora duže od šest mjeseci.

Član 62.

Visokoškolska ustanova odnosno univerzitet koji organizuje dodiplomski studij postupa po Zakonu o općem upravnom postupku kada rješava o pojedinačnim pravima i obavezama o :

1. upisu kandidata u prvu godinu studija;
2. upisu kandidata u narednu godinu studija;
3. pravu studenata na izdavanje diplome;
4. mjeri isključenja;

5. Obavezi plaćanja troškova studija.

Član 63.

Studenti postdiplomskog studija ostvaruju prava i izvršavaju obaveze u toku studija u skladu sa ovim zakonom i pravilima visokoškolske ustanove, odnosno općim aktom univerziteta koji organizuje postdiplomski studij.

Na prava i obaveze studenata postdiplomskog studija shodno se primjenjuju odredbe čl. 57. do 62. ovog zakona.

VI. NASTAVNICI I SARADNICI

Član 64.

Nastavnici se biraju u zvanju docenta, vanrednog profesora i redovnog profesora.

Izuzetno od odredbe prethodnog stava, nastavnici nastavnih predmeta strani jezik, i fizičkog vaspitanja mogu se birati u zvanje predavača, ako visokoškolska ustanova nije matična za te predmete.

Član 65.

Saradnici se biraju u zvanje asistenta i višeg asistenta.

Drugi saradnici utvrđuju se pravilima visokoškolske ustanove.

Član 66.

Uslovi za izbor nastavnika su:

- za predavača: naučni stepen magistra ili stručni stepen specijaliste i naučni odnosno stručni radovi odnosno stručni radovi objavljeni u naučnim ili stručnim časopisima i zbornicima i pokazani rezultati u nastavnom radu;
- za docenta: naučni stepen doktora nauka, naučni radovi objavljeni u naučnim ili stručnim časopisima ili zbornicima i pokazani rezultat u nastavnom radu;
- za vanrednog profesora: naučni stepen doktora nauka, objavljena knjiga ili monografija , više naučnih radova objavljenih u naučnim časopisima i zbornicima, rezultati vlastitih istraživanja u primjeni, doprinos u stvaranju novog nastavnog odnosno naučno-istraživačkog kadra i pokazani rezultati u nastavnom radu.
- za redovnog profesora: naučni stepen doktora nauka, više objavljenih knjiga i drugih naučnih radova citiranih u naučnoj literaturi, rezultat vlastitih istraživanja u primjeni priznati u naučno-istraživačkoj javnosti, doprinos razvoju i afirmaciji naučne i stručne oblasti kojom se bavi i doprinos u podizanju nastavnog i naučnoistraživačkog kadra.
- objavljeni naučni odnosno stručni radovi u smislu prethodnog stava moraju biti pretežno iz naučne, odnosno stručne oblasti za koju se nastavnik bira.

- pod doprinosom u podizanju novog nastavnog i naučnoistraživačkog kadra u smislu stava 1. ovog člana porazumjeva se, naročito, mentorstvo pri izradi doktorske disertacije ili magistarskog rada i rukovođenje naučnoistraživačkim projektima.

Član 67.

Uslovi za izbor nastavnika stručno-umjetničkih predmeta na umjetničkoj akademiji su:

- za docenta: visoka stručna sprema, veći broj javno predstavljenih oblika umjetničkog stvaralaštva i pokazani rezultati u nastavnom radu;
- za vanrednog profesora: visoka stručna sprema, veći broj javno predstavljenih oblika umjetničkog stvaralaštva, priznanja za uspješno djelovanje u odgovarajućoj oblasti umjetnosti i prikazani rezultati u nastavnom radu;
- za redovnog profesora: visoka stručna sprema, veći broj javno predstavljenih oblika umjetničkog stvaralaštva koji su značajno doprinjeli razvoju kulture i umjetnosti i doprinos podizanju nastavnog i umjetničkog kadra. Odredba prethodnog stava primjenjuje se i na nastavnike u ostalim visokoškolskim ustanovama, ako je za nastavni predmet od naručitog značaja umjetnički kriterij.
- Nastavni predmeti iz prethodnog stava utvrđuju se pravilima visokoškolske ustanove, uz prethodnu saglasnost univerziteta.

Član 68.

Nastavnik se bira za nastavni predmet ili za užu naučnu, odnosno umjetničku oblast.

Član 69.

Uslovi za izbor saradnika su:

- za asistenta: visoka stručna sprema;
- za višeg asistenta: naučni stepen magistra ili stručni stepen specijaliste, odnosno visoka stručna sprema i javno predstavljeni oblici umjetničkog stvaralaštva.

Asistent i viši asistent biraju se za užu naučnu odnosno umjetničku oblast ili nastavni predmet.

Drugi uslov za izbor asistenta, višeg asistenta i uslovi za izbor drugih saradnika utvrđuju se pravilima visokoškolske ustanove.

Član 70.

Visokoškolska ustanova je dužna da rasporedom radnog vremena i na drugi način omogućiti asistentu sticanje naučnog stepena magistra, odnosno stručnog stepena specijaliste.

Asistent i viši asistent ne mogu samostalno držati predavanja niti obavljati ispite.

Drugi saradnici ne mogu držati predavanja niti obavljati ispite.

Član 71.

Asistent se bira za vrijeme od najduže četiri godine i ne može biti ponovo izabran u isto zvanje. Viši asistent se bira za vrijeme od pet godina i može ponovo biti izabran u isto zvanje ako ima naučni stepen doktora nauka odnosno veći broj javno predstavljenih oblika umjetničkog stvaralaštva.

Visokoškolska ustanova može, pod uslovima utvrđenim pravilima, dodjeliti zvanje naslovnog docenta višem asistentu koji ispunji uslove iz člana 66. stav 1. alineja 2., odnosno člana 67. stav 1. ovog zakona.

Predavač i docent biraju se za vrijeme od pet godina, a vanredni profesor za vrijeme od šest godina i mogu biti ponovo izabrani u isto ili više zvanje.

Redovni profesor se bira na neodređeno vrijeme.

Izuzetno od odredaba st. 1, 2, 4, i 5. ovog člana lica koja ispunjavaju uslove određene ovim zakonom i koja ne zasnivaju radni odnos u visokoškolskoj ustanovi mogu se izabrati u zvanje asistenta, višeg asistenta, predavača, docenta, vanrednog profesora i redovnog profesora na vrijeme od četiri godine.

Prilikom izbora u više ili isto zvanje uzimaju se u obzir samo objavljeni radovi, knjige i rezultati vlastitih istraživanja u primjeni, odnosno javno predstavljeni oblici umjetničkog stvaralaštva u vremenu od posljednjeg izbora.

Član 72.

Izbor nastavnika, viših asistenata i asistenata u isto ili više zvanje (u daljem tekstu: izbor) vrši nastavno-naučno, odnosno nastavno-umjetničko vijeće, uz prethodnu saglasnost univerziteta.

Izbor se vrši na osnovu konkursa koji, na prijedlog nastavno-naučnog, odnosno nastavno-umjetničkog vijeća, objavljuje savjet visokoškolske ustanove.

Konkurs iz prethodnog stava objavljuje se u javnim glasilima.

Član 73.

Za pripremanje prijedloga za izbor nastavno-naučno odnosno nastavno-umjetničko vijeće imenuje komisiju iz reda nastavnika u istom ili višem zvanju od zvanja u koje se kandidat bira.

Većina članova komisije mora biti iz uže, a ostali mogu biti iz srodne naučne odnosno umjetničke oblasti za koju se kandidat bira.

Kandidat ima pravo da podnese prigovor na sastav komisije iz prethodnog stava.

Prigovor se podnosi organu utvrđenom pravilima univerziteta, u roku od osam dana od prijema obavještenja o sastavu komisije.

Protiv odluke organa u smislu prethodnog stava ne može se pokrenuti radni spor.

Član 74.

Kandidat koji nije ranije izvodio nastavu u visokoškolskoj ustanovi dužan je da pred komisijom iz st. 1. i 2. prethodnog člana održi predavanje iz nastavnog predmeta, odnosno uže nastavne oblasti za koju je konkurisao.

Visokoškolska ustanova dužna je da oglasi vrijeme održavanja predavanja iz prethodnog stava.

Član 75.

Nastavno-naučno odnosno nastavno-umjetničko vijeće dužno je da prije utvrđivanja prijedloga za izbor pribavi mišljenje zbora studenata odgovarajuće godine studija, osim u slučaju kada nastavnik ili viši asistent zasniva radni odnos u visokoškolskoj ustanovi ili učestvuje u nastavi prve godine studija.

Član 76.

Nastavno-naučno odnosno nastavno-umjetničko vijeće dostavlja univerzitetu prijedlog za izbor radi davanja saglasnosti.

Rok za dostavljanje prijedloga za izbor ne može biti duži od 60 dana od dana isteka roka za podnošenje prijave na konkurs.

Univerzitet je dužan da u roku od 30 dana od dana prijema prijedloga za izbor dostavi visokoškolskoj ustanovi saglasnost, odnosno odbije davanje saglasnosti na izbor.

Univerzitet daje saglasnost iz prethodnog stava na osnovu mišljenja matične visokoškolske ustanove.

Bliže odredbe o sadržaju prijedloga za izbor i o postupku davanja saglasnosti na izbor sadrže pravila univerziteta.

Član 77.

Postupak izbora drugih saradnika utvrđuje se pravilo visokoškolske ustanove.

Član 78.

Nastavniku i višem asistentu koji ne bude izabran u isto ili više zvanja prestaje radni odnos u skladu sa općim aktom visokoškolske ustanove u roku od godinu dana od dana donošenja odluke o izboru, ako visokoškolska ustanova nema mogućnost da ga rasporedi na druge odgovarajuće poslove.

Za nastavnika i višeg asistenta iz prethodnog stava koji ima do 15 godina staža otkazni rok iznosi šest mjeseci, a sa dužim stažom jednu godinu.

Otkazni rok iz prethodnog stava teče od dana isteka roka od godinu dana iz stava 1. ovog člana.

Asistentu prestaje radni odnos istekom vremena za koje je zasnovao radni odnos.

Član 79.

Pravilima visokoškolske ustanove, u skladu sa pravilima univerziteta, utvrđuje se:

- način obezbjeđivanja nesmetanog izvođenja nastave i održavanja ispita za vrijeme dok je nastavnik na bolovanju, odsustvu ili obavlja javnu funkciju;
- slučajevi, postupak i vrijeme pozivanja nastavnika drugih visokoškolskih ustanova da izvode nastavu određenog nastavnog predmeta;
- slučajevi i postupak pozivanja nastavnika drugih visokoškolskih ustanova, naučnih radnika ili istaknutih stručnjaka iz prakse da održe pojedina predavanja ili druge oblike nastave.

U slučaju iz alineja 2. i 3. prethodnog stava pozvani nastavnici odnosno naučni radnici i istaknuti stručnjaci iz prakse ne zasnivaju radni odnos u visokoškolskoj ustanovi i ne biraju se u zvanje nastavnika.

Član 80.

Na prijedlog visokoškolske ustanove univerziteti mogu penzionisanom redovnom profesoru dodjeliti počasno zvanje profesor emeritus.

Profesor emeritus ima pravo da bude član komisije za izbor nastavnika i za ocjenu i odbranu doktorskih disertacija i magistarskih odnosa specijalističkih radova i druga prava utvrđena pravilima univerziteta.

VII. UPRAVLJANJE

Član 81.

Visokoškolskom ustanovom upravlja upravni odbor, koji ima najmanje pet, a najviše devet članova.

Jedna trećina članova upravnog odbora imenuje se iz reda nastavnika i saradnika zaposlenih u toj visokoškolskoj ustanovi.

Član 82. brisan

Član 83.

Visokoškolskom ustanovom rukovodi dekan, koji se imenuje za vrijeme od dvije godine i može biti ponovno imenovan.

Dekan se imenuje na prijedlog nastavno-naučnog, odnosno nastavno-umjetničkog vijeća iz reda redovnih i vanrednih profesora koji su u visokoškolskoj ustanovi u stalnom radnom odnosu sa punim radnim vremenom.

Prijedlog za prijevremeno razrješenje dekana, pored organa, odnosno lica iz člana 33. stav 2. Zakona o ustanovama može dati i nastavno-naučno, odnosno nastavno-umjetničko vijeće.

Član 84.

Nastavno-naučno odnosno nastavno-umjetničko vijeće je stručni organ visokoškolske ustanove koji sačinjavaju nastavnici i predstavnici saradnika i redovnih studenata.

Nastavno-naučno odnosno nastavno-umjetničko vijeće:

- utvrđuje prijedlog nastavnog plana i nastavnih programa;
- donosi nastavne programe;
- donosi programe naučnoistraživačkog, odnosno umjetničkog rada;
- ocjenjuje rezultate nastave i naučnoistraživačkog odnosno umjetničkog rada;
- obavlja i druge poslove u skladu sa ovim zakonima i pravilima;

Pravilima visokoškolske ustanove određuje se sastav i broj članova nastavno-naučnog odnosno nastavno-umjetničkog vijeća i sastav, broj i nadležnost drugih stručnih organa visokoškolske ustanove.

Član 85.

Savjet univerziteta je najviši organ upravljanja univerziteta i čine ga delegati visokoškolskih ustanova i naučnih ustanova udruženih u univerzitet, delegati redovnih studenata i predstavnici Skupštine R BiH.

Dvije trećine savjeta su delegati visokoškolskih ustanova i naučnih ustanova, a jedna trećina delegati redovnih studenata i predstavnici Skupštine R BiH, s tim što je broj delegata redovnih studenata veći od broja predstavnika Skupštine R BiH.

Sastav i broj članova savjeta utvrđuju se pravilima univerziteta

Član 86.

Rektor je poslovodni organ univerziteta.

Rektor organizuje i rukovodi radom univerziteta, zastupa univerzitet prema trećim licima i odgovoran je za zakonitost rada univerziteta.

Rektor imenuje i razrješava savjet univerziteta iz reda redovnih profesora udruženih visokoškolskih ustanova na način utvrđen pravilima univerziteta.

Član 87.

Univerzitet ima nastavno-naučno, odnosno nastavno-umjetničko vijeće kao stručni organ.

Kada univerzitet organizuje studij, nastavno naučno odnosno nastavno-umjetničko vijeće donosi nastavni plan i nastavne programe tog studija i obavlja poslove iz člana 84. stav 2. alineja 3. i 4. ovog zakona.

Pravilima univerziteta određuje se sastav, broj članova i nadležnosti nastavno-naučnog odnosno nastavno-umjetničkog vijeća i drugih organa univerziteta.

Član 88.

Sastav, broj i nadležnosti organa upravljanja i stručnih organa zajednice univerziteta utvrđuje se ugovorom.

Član 89.

Univerziteti podnose izvještaj o radu vladi Republike Bosne i Hercegovine jednom godišnje, a Skupština RBiH jednom u četiri godine.

VIII. EVIDENCIJA I JAVNE ISPRAVE

Član 90.

Visokoškolska ustanova i univerzitet vode matične knjige studenata i lica koja su stekla višu odnosno visoku stručnu spremu, stručni stepen specijaliste, naučni odnosno umjetnički stepen magistra i naučni stepen doktora nauka, kao i evidenciju o ispitima, o uspjehu studenata na kraju školske godine, o izdatim diplomama i druge evidencije utvrđene općim aktima univerziteta.

Matične knjige i evidencije o izdatim diplomama trajno se čuvaju.

Bliži propis o načinu vođenja poslovnih knjiga i evidencije o izdatim diplomama donosi republički organ uprave nadležan za poslove obrazovanja.

Bliže propise o načinu vođenja druge evidencije donosi univerzitet.

Član 91.

Javne isprave, u smislu ovog zakona su: diploma o stečenom stepenu stručne spreme, index, ispisnice, uvjerenje o diplomiranju, uvjerenje o položenim ispitima, uvjerenje o uspjehu u studiju i uvjerenje o učešću u pojedinim oblicima stručnog usavršavanja.

Bliži propis o sadržaju javnih isprava donosi republički organ uprave nadležan za poslove obrazovanja.

IX. POTREBE I INTERESI DRUŠTVA U VISOKOM OBRAZOVANJU

Član 92.

Potrebe i interesi društva u visokom obrazovanju, u smislu ovog zakona su:

- organizovanje dodiplomskog i postdiplomskog studija;
- unapređivanje djelatnosti visokog obrazovanja;
- obezbjeđenje uslova za studiranje i usavršavanje studenata RBiH koji postižu natprosječne rezultate u studiju;
- stipendiranje redovnih studenata državljana Republike Bosne i Hercegovine.

Član 93.

Sredstva za zadovoljavanje potreba i interesa društva iz prethodnog člana obezbjeđuje se iz prihoda Republike.

Visina sredstava za zadovoljavanje potreba i interesa društva iz prethodnog člana utvrđuje se u skladu sa propisom o učešću tih potreba i interesa u društvenom proizvodu.

Član 94.

Sredstva za zadovoljavanje potreba i interesa društva iz član 92. ovog zakona stiču se putem Republičkog javnog fonda.

Republički javni fond osniva Skupština RBiH.

Republički javni fond ima svojstvo društvenog pravnog lica.

Nadzor nad zakonitošću rad Republičkog javnog fonda vrši republički organ uprave nadležan za poslove obrazovanja.

Član 95.

Republičkim javnim fondom upravlja upravni odbor i direktor Republičkog javnog fonda.

Upravni odbor ima 15 članova.

Rektori univerziteta su članovi Upravnog odbora po položaju.

Ostale članove upravnog odbora i direktora imenuju Vlada Republike Bosne i Hercegovine na vrijeme od četiri godine.

Direktor se imenuje iz reda članova Upravnog odbora.

Direktor predstavlja republički javni fond i izvršava akte Upravnog odbora.

Član 96.

Upravni odbor Republičkog javnog fonda:

1. utvrđuje prijedlog dugoročnog programa iz člana 4. ovog zakona;
2. utvrđuje Standarde visokog obrazovanja i Normative;
3. utvrđuje kriterije za raspodjelu sredstava;
4. donosi finansijski plan kojim utvrđuje obim i vrstu potreba i interesa društva iz člana 92. ovog zakona za finansiranje u tekućoj godini;
5. utvrđuje elemente konkursa iz člana 50. stav 1. tač. 1. i 2. ovog zakona;
6. utvrđuje kriterije o uslovima, visini i načinu plaćanja troškova studija;
7. objavljuje konkurs za dodjelu sredstava studentima koji postižu natprosječne rezultate u studiju i konkurs za dodjelu stipendija redovnim studentima;
8. raspoređuje sredstva na korisnike;
9. vrši kontrolu namjenskog korištenja sredstava;

10. provodi utvrđenu politiku, odluke i zaključke Skupštine R BiH;
11. donosi završni račun;
12. najmanje jedanput godišnje podnosi Skupštini R BiH izvještaj o radu i poslovanju Republičkog javnog fonda;
13. Donosi poslovnik o svome radu.

Akte iz tač. 1. do 6. prethodnog stava Upravni odbor Republičkog javnog fonda donosi uz suglasnost funkcionera koji rukovodi republičkim organom uprave nadležnim za poslove obrazovanja.

Kriteriji za raspodjelu sredstava javnim visokoškolskim ustanovama i univerzitetima utvrđuju se u skladu sa Standardima visokog obrazovanja i Normativima.

Kriteriji o uslovima, visini i načinu plaćanja troškova studija i kriteriji za dodjelu stipendija donose se, prvenstveno, zavisno od uspješnosti u studiju, ili uspješnosti u prethodnom školovanju.

Finansijski plan donosi se u skladu sa dugoročnim programom iz člana 4. ovog zakona.

Član 97.

Stručne i druge poslove za Republički javni fond obavlja stručna služba tog fonda.

Članovi 94, 95, 96, i 97 nisu ukinuti zakonom, ali je ukinut Republički javni fond za visoko obrazovanje, pa su ovi članovi kojima su razrađene odredbe o Fondu, prestali da važe.

Član 98.

Javna visokoškolska ustanova i univerzitet stiču sredstva putem Republičkog javnog fonda za zadovoljavanje potreba i interesa društva iz člana 92. alineja 2. ovog zakona, na osnovu godišnjeg programa rada, koji donosi u skladu sa dugoročnim programom iz člana 4. ovog zakona.

Univerzitet stiče sredstva putem Republičkog javnog fonda za zadovoljavanje potreba i interesa iz člana 92. alineja 2. ovog zakona, na osnovu godišnjeg programa rada, koji donosi u skladu sa poslovima i zadacima utvrđeni ovim zakonom.

Član 99.

Sredstva za zadovoljavanje potreba i interesa društva iz člana 92. alineja 1. i 2. ovog zakona putem Republičkog javnog fonda može da stiče visokoškolska ustanova čiji je osnivač drugo pravno ili fizičko lice – za organizovanje, dodiplomsko i postdiplomskog studija, na osnovu ugovora koji zaključuje osnivač sa Republičkim javnim fondom, pod uslovom da visokoškolska ustanova ispunjava uslove u skladu sa Standardima visokog obrazovanja i Normativima, da je studij predviđen dugoročnim programom iz člana 4. ovog zakona i da taj studij nije organizovala javna visokoškolska ustanova ili se na taj način obezbjeđuje racionalnije korištenje sredstava i kvalitetnije organizovanje studija.

Član 100.

Visokoškolske ustanove i univerziteti mogu sticati prihod:

- iz participacije studenata i drugih građana;
- prodajom intelektualnih, kulturnih i materijalnih dobara i usluga;
- iz legata, poklona i zavještanja;
- iz drugih izvora.

Univerzitet stiče prihod i učešća naučnih ustanova iz člana 6. stav 2. ovog zakona, u skladu sa ugovorom o udruživanju.

Član 101.

Ako se kao kriterij za dodjelu stipendija redovnim studentima utvrdi određenim imovinski cenzus, o ispunjenju tog kriterija rješava općinski organ uprave nadležan za poslove obrazovanja na čijem je području prebivalište studenta.

Općinski organ uprave iz prethodnog stava dužan je donjeti rješenje u roku od 20 dana od dana predaje urednog zahtjeva.

Protiv rješenja iz prethodnog stava može se izjaviti žalba republičkom organu uprave nadležnom za poslove obrazovanja u roku od osam dana od prijema rješenja.

X. NADZOR NAD ZAKONITOŠĆU RADA

Član 102.

Nadzor nad provođenjem ovog zakona i propisa donesenih za njegovo provođenje vrši republički organ uprave nadležan za poslove obrazovanja.

Univerziteti, školske ustanove i Republički javni fond dužni su da organu iz prethodnog stava dostave, prije usvajanja, ugovore o udruživanju i pravila radi utvrđivanja da li su usaglašeni sa zakonom.

XI. KAZNENE ODREDBE

Član 103.

Novčanom kaznom od 20.000 do 40.000 dinara kazniti će se za prekršaj visokoškolska ustanova, ako:

1. počne sa radom bez rješenja republičkog organa uprave nadležnog za poslove obrazovanja (član 17. stav 1);
2. izvrši upis studenata u prvu godinu studija protivno članu 19. stav 3. ovog zakona;
3. proširi djelatnost i izvrši druge statusne promjene protivno članu 20. stav 1. ovog zakona;
4. ne izvodi nastavu u skladu sa nastavnim planom (član 23.);

5. primjenjuje nastavni plan i nastavne programe za koje nije dobila saglasnost univerziteta (član 25. i član 32. stav 3);
6. prekorači sedmični broj časova nastave za studente (član 29. stav 5);
7. ne obezbjeđi ispitne rokove i ispitne termine u skladu sa članom 29. stav 7. ovog zakona;
8. organizuje postdiplomski studij za naučne odnosno stručne oblasti za koje nije matična (član 31. stav 1.);
9. asistent, viši asistent ili drugi saradnik drži predavanja odnosno ispите suprotno članu 70. st. 2. i 3. ovog zakona;
10. izvrši izbor nastavnika bez saglasnosti univerziteta (član 72. stav 1);
11. prekorači rok iz člana 76. stav 2. ovog zakona;
12. usvoji pravila prije prethodnog dostavljanja republičkom organu uprave nadležnom za poslove obrazovanja (član 102. stav 2).

Za prekršaj iz prethodnog stava kazniće se i odgovorno lice u visokoškolskoj ustanovi novčanom kaznom od 2.000 do 10.000.

Član 104.

Novčanom kaznom od 30.000 do 40.000 dinara kazniće se za prekršaj visokoškolska ustanova iz druge republike i autonomne pokrajine koja na teritoriji Socijalističke Republike Bosne i Hercegovine organizuje dodiplomski studij za vanredne studente, bez saglasnosti republičkog organa uprave nadležnog za poslove obrazovanja.

Za prekršaj iz prethodnog stava kazniće se i odgovorno lice u visokoškolskoj ustanovi novčanom kaznom od 8.000 do 10.000 dinara

XII. PRELAZNE I ZAVRŠNE ODREDBE

Član 105.

Danom stupanja na snagu ovog zakona Skupština RBiH preuzima pravo osnivača prema zatečenim visokoškolskim ustanovama koje su osnovale druga društveno pravna lica.

Član 106.

Skupština RBiH donijeće dugoročni program iz člana 4. ovog zakona u roku od jedne godine od prestanka ratnog stanja.

Član 107.

Skupština RBiH donijeće akt o osnivanju Republičkog javnog fonda u roku od 60 dana od dana stupanja na snagu ovog zakona.

Vlada Republike Bosne i Hercegovine imenovće članove Upravnog odbora i direktora republičkog javnog fonda u rok od 30 dana od dana donošenja akta o osnivanju Republičkog javnog fonda.

Član 108.

Izuzetno, do reintegracije doprinosa u poreze, sredstva za zadovoljavanje potreba i interesa društva iz člana 92. ovog zakona obezbjeđuju se u skladu sa Zakonom o ukidanju samoupravnih interesa zajednica („Službeni list RBiH“, broj 36/90), i usmjeravaju na poseban račun Republičkog javnog fonda.

Član 109.

Upravni odbor Republičkog javnog fonda utvrdiće Standarde visokog obrazovanja i Normative i kriterije za raspodjelu sredstava iz člana 96. stav 1. tač. 2. i 3. Ovog zakona u roku od 90 dana od dana imenovanja članova Upravnog odbora direktora Republičkog javnog fonda.

Član 110.

Funkcioner koji rukovodi republičkim organom uprave nadležnim za poslove, obrazovanja donijeće bliži propis iz člana 14. stav 3, a propise iz člana 90. stav 3. i član 91. stav 2. ovog zakona donijeće republički organ uprave nadležan za poslove obrazovanja u roku od šest mjeseci od dana stupanja na snagu ovog zakona.

Član 111.

Visokoškolske ustanove dužne su da usklade pravila sa ovim zakonom, u roku od šest mjeseci od dana stupanja na snagu ovog zakona.

Član 112.

Visokoškolske ustanove dužne su da zaključe ugovore o udruživanju u univerzitet u roku od šest mjeseci od dana stupanja na snagu ovog zakona.

Član 113.

Univerzitet će odrediti naučne odnosno stručne i umjetničke oblasti za koje su visokoškolske ustanove matične za sticanje stručnog stepena specijaliste, naučnog odnosno umjetničkog stepena magistra i naučnog stepena doktora nauka, u roku od šest mjeseci od dana stupanja na snagu ovog zakona.

Član 114.

Visokoškolske ustanove donijeće nastavne planove i nastavne programe, u roku od šest mjeseci od dana stupanja na snagu ovog zakona.

Član 115.

Postupak za sticanje naučnog stepena doktora nauka, ako nije obrazovana komisija iz člana 64. Zakona o visokom obrazovanju – Prečišćeni tekst („Službeni list RBiH“, broj 11/85 i br. 30/87 i 32/87) završiće se u skladu sa odredbama ovog zakona.

Član 116.

Redovni student, koji je do stupanja na snagu ovog zakona izgubio pravo na dalje redovno studiranje u visokoškolskoj ustanovi u smislu člana 87. Zakona o visokom obrazovanju, može nastaviti redovan studij u toj visokoškolskoj ustanovi, uz obavezno plaćanje troškova studija.

Član 117.

Zatečeno zvanje asistenta pripravnika zamjenjuje se zvanjem asistenta, a zvanje asistenta zamjenjuje se zvanjem višeg asistenta, danom stupanja na snagu ovog zakona.

Član 118.

Rok za ponovni izbor zatečenih nastavnika i viših asistenata teče od dana stupanja na snagu ovog zakona.

Zatečenim asistentima prestaje radni odnos najkasnije istekom roka od četiri godine od dana zasnivanja radnog odnosa u zvanju asistenta pripravnika, ako ne budu izabrani u zvanje višeg asistenta u skladu sa ovim zakonom.